



Uss a bass 20 meters, lu ad ault

Emprema badelada dil project «Residenza s. Giusep»



Dall'emprema badelada han tuts involvai ed investurs priu part. Dretg davontier igl architect Conradin Clavuot, sper el il conpossessur da Nocasa, Flurin Candinas. Ella retscha era la presidenta communal da Ilanz/Glion Carmelia Maissen, la priura dalla claustra dalle soras dominicanas sr. Annemarie Müller e Corina Schnoz, la meinagestion dalla Spitex Foppa.

■ **(anr/abc) ler ein ils investurs, patrunds da baghegiar ed architect s'entupai a Glion per dar l'emprema badelada per in project da 43 milliuns francs.** Las relaziuns dall'aura savessen esser in bien segn pil project: La damaun haveva ei pluiu sco cun dialas. Exact entuorn las 13.00 han ils nibels fatg plaz ed ei ha dau ina sulegliada. Al las 14.00 han ils responsabels saviu dar l'emprema badelada senza vegnir bletschs. Duas uras pli tard ei il tschiel puspei seseraus, e sco il diluvi ha ei cuntinuau a plover. Per *Norbert e Flurin Candinas*, ils possessurs dall'interpresa Nocasa Baumanagement SA, sco era pigl architect *Conradin Clavuot* savess quei esser ina satisfacziun per il liung temps da planisaziun. Otg onns hagian las preparativas cuzzau, ha Flurin Candinas explicau all'entschatta digl act d'installaziun

dil plazzal da baghegiar per la residenza s. Giusep. En dus onns, igl atun 2021, vegn la surbaghegiada ad esser finida ed ils emprims fittadins san dislocar en ina dallas 77 habitaziuns. Quei grond project en proxima vischinonza dil spital finanziescha la Nocasa da cuminonza culla fundaziun Zürich Invest AG dalla segirada Zürich. El vegn realisau cun in concept dil habitar cun assistenz. A tgi che vegn a prender a tscheins ina dallas habitaziuns garantiescha Nocasa in survetsch sur 24 uras. Tier la purschida fundamentala s'audan prestaziuns per il cass d'urgenza, vitier vegnan – tenor giavisch e basegns – il survetsch da gastro-nomia e tenercasa. All'emprema badelada ei era la meinagestion dalla Spitex Foppa, *Corina Schnoz*, separticipada. L'organisaziun vegn a surprender ina gronda part dalla purschida. Il Spital regional Surselva ch'ei

ella proxima vischinonza vegn medema-mein ad esser in dils cooperaturs locals per l'assistenz. Finamira eis ei ch'ills habitonts sappien guder lur dacasa il pli gitg pusseivel cun tuts survetschs pusseivels.

Il special vid la residenza s. Giusep ei che pliras localitads vegnan ad esser publicas. «Il project a Glion accentuescha nies engaschi pil svilup e la formaziun da spazis da viver futurs. Nus vulein sustener sapientivamein las vischnauncas en lur incumbenza da proveder la populaziun cun quei», ha *Doris Neuhäusler*, la menadra da project per la strategia d'immobias dalla Fundaziun collectiva Vita, detg. Quell'instituziun ei la gronda da pliras che confinzieschan il project da 43 milliuns francs. En vesta eis ei da certificar la residenza s. Giusep sco casa cun assistenz e sustegn per la vegliadetgna.



Era pigl architect Clavuot ei l'emprema badelada da quei project stau in mument special. Avon otg onns haveva el inoltrau als investurs duas empremas propostas. Ina prevedeva da disfar la claustra veglia, l'auter – siu favorit – ha integrau quel ella surbaghegiada. L'antieriura scola da tgirunzas, aunc pli baul igl institut vegl da s. Giusep dallas soras dominicanas da Glion, astga buca vegnir disfatga. Ell'ei integrada ella surbaghegiada, en quella vegn ei a dar 16 dallas 77 habitaziuns.